

Mario Tromp:

Construccion y renobacion di Colegio San Antonio ta un deseo cu a bira realidad

ORANJESTAD- Ningun hende lo por imagina con importante e dia aki ta pa mi y con emociona mi ta sinti mi", tabata palabranan di e cabesante di Colegio San Antonio, Meneer Mario Tromp na momento di desvela e presentacion di loke lo bira Colegio San Antonio renoba y adapta.

E director di un manera simbolico a yama dilanti un docente cu a sa di carga e scol cu cariño y determinacion

cu ta baha dentro di poco cu pensioen, pa e devela den nomber di e docentenan y alumnonan e borch.

Mi kier yama danki na departamento di Enseñansa, na Minister Michelle Hooyboer Winklaar y e personal di su Ministerio y tur esunnan cu awe ta presente pa hunto cu nos celebra e dia tan anhela aki. Pero primordialmente mi kier gradici e staf y personal di nos scol cu a sa di tin pasenshi, curashi y determinacion pa sigui hunto a pesar

di tur contratiempo", asina e director di Colegio San Antonio a bisa den su discurso.

A funda Colegio San Antonio na aña 1959 y recien a celebra 55 aña di existencia. E trabou di construccion ta den man di Bouw en Handelmaatschappij Aruba N.V. Bohama y sub contratista CHS Technical Contracting & Trading Company N.V. bao direccion di DOW departamento di ehecucion. Ta premira cu lo keda cla cu e trabou y entrega completo pa aña 2016.

Na momento cu e alumnonan regresa na Colegio San Antonio Santa Cruz, cu ta na inicio di e aña escolar 2015 2016, nan lo topa un scol renoba y amplia. Mirando for di perspectiva di renobacion lo haya algo cu no por anticipa nunca. Un ambiente di educacion tremendo.

Infraestructura pa loke ta trata Colegio San Antonio ta magnificamente hinca den otro. E renobacion y adaptacion di esaki ta cuadra cu e espirito

di scol, di tur loke kier logra den futuro. E inspiracion y cambionan cu lo kier trece den enseñanza ta refleha den e edificio cu awor a cuminsa den pleno construccion.

Colegio San Antonio ta traha entre otro riba e sistema di "leerlingvolgsysteem", na unda e alumnonan tin acceso y mayornan por sigui e adelanto y tambe actividadnan di cada alumno. Colegio San Antonio ta un di e prome nan cu a introduci e sistema aki.

